

SARDHI LIBARI

TANTI SABII UMPARI PA LA NAZIONI SARDHA

In Aristhanis, tziddai di Eleonora d'Aiburia, dumenigga 16 di lu mesi di naddari 2018, si so attuppaddi l'imbasciadori di li movimenti puritigghi, sotzi culturali di la sotzieddai tzipiri pa apparaurassi tutt'umpari i lu Manifesthu di Libarthai e Rinascidda di la Sardhigna.

Un'iffida natziunari, culturali, puritigga, sutziari e economica cu' li sardhi prutagunisthi e inzirriadori di lu tempu avvini d'eddi.

LA LIBARTHAI DI LU POBURU SARDHU è l'iffida più altha in gradu, cuntreta, disizadda e netzessaria pa l'emancipazioni puritigga, economica, sotziari e culturali di la Sardhigna. Un'iffida impunenti e ambiziosa pa libarà la Sardhigna da dugna appundaradda; pa dà varori a li pecuriari putenziariddai culturali, sutziari e di l'economia; pa pudetzi autodeteimminatzi e assé prutagunisthi i l'isciohari di lu tempu a vini nosthru.

Sardhi Libari pa la libarthai di lu Poburu Sardhu è un prugettu mudennu e autorevuri pa la Rinascidda di la Sardhigna.

La prupostha, abertha a l'ischumbattu libaru e parthecipaddu, nasci da lu pritzisaddu d'auni umpari li sardhi libari, ki s'intendini ciamaddi a l'uniddai di una radizi natziunari antigga, forthi e isthrintu a pari, capatzi d'ischumpassà l'erediddai ideorogici di lu nobizentu e auni li megliu fotzi soru i l'intaressu di lu Poburu Sardhu.

Lu primma prisupposthu di kisthu manifesthu natziunari è la Libarthai di lu Poburu Sardhu.

1. LIBARTHAI DA LU BISOGNU

Lu primma ubbiettibu è l'emancipazioni puritigga, economica, sutziari e culturali di li sardhi. Vurimmu ki li giobani aggiani sempri la pussibiriddai di campà e trabaglià i la terra d'eddi, pa no assé custhretti a lagà la Sardhigna a tzirchà kissu trabagliu e lu vini. Kisthu po sutzidi cun un pianu isthraidhinariu pa lu trabagliu ki ponghia afficcu a atzioni lesthri d'incentivatzioni a l'assuntzioni e a la fuimmazioni di faculthai, acciaraddi a l'impresi minori, medie e manni di la Sardhigna, puru cu' la creazioni di la cabura franca integrari.

2. LIBARTHAI DI PIANIFICÀ

Pa ditzidi noi matessi l'azioni di piglià e pudé mandà addanantzi un pianu epucari d'assentu economicu, manu a atzioni di misurazioni di lu gap e di la cumpezazioni soia, in teimmini infrastrutturari, fischari e economici. Lu PARIS, (Pianu Attuatibu di Riecuiribriu Insurari di la Sardhigna) custhrituizeggia la prupostha economica e sutziari più innubatiba e avantzadda di rinascidda di la Sardhigna;

3. LIBARTHAI DI FRABBIGÀ LU TEMPU A VINI NOSTRHU

Mirendi a dà varori veru a la terra nosthra, da l'agricoltura a la pasthuritzia, da lu turismu a l'arkeorogia, da la Innovation Technology a la cultura, da l'ambienti a la tzercha iscientifigga appricadda, da lu cummetziu a l'arthigianaddu;

4. LIBARTHAI DI DIFINDÌ LA TERRA NOSTHRA

Libarthai pa lu Poburu nosthru da dischrimazioni e tzirakii itariani e europee, sighendi li caddeni ki ani arriggiddu e arrigginu l'iviruppu e la crescidada di la Sardhigna;

5. LIBARTHAI DI MOVIMENTU

Kena dischrimazioni di dugna manera, dendi garanzia a la Sardhigna di li pari cundizioni unibessari di mubiriddai, bughhendinni monopori e ipicurazioni via terra, aria e mari;

6. LIBARTHAI CULTURARI

Pa libaratzu di l'appundaradda di l'appundariu, e pa videtzi paraddi a dà amparu a la varorizazioni di la lingua mamma nosthra e puru a dà afficcu a lu patrimoniù culturali mannu nosthru, kissu arkeorogicu e isthoriggu, ki cun cuipa grabi no è tentu contu e depuntenziaddu da una crassi dirigenti sarora e liadda a pari a althri kintari;

7. LIBARTHAI FISCHARI

Pa dà benessere nobu, calibrendi l'intraddi tributarii a l'esigentzi di l'economia nosthra pa una fischariddai justha.

8. LIBARTHAI DI DITZIDI IN CAMPU INTERNATZIUNARI

Pa una Sardhigna ripunsabiri in primma passona cu' la creazioni di un'isthuttura tecnica capatzi di frabbiggà maneri fatziri i l'atoppi e i l'apparauraddi economici, puritigghi e culturali cu' li poburi di lu mondu. L'ischopu è kissu di lià l'ambiti isthategici di lu sisthema economicu: traiporthi, agricoltura, produzioni, cummetziu, tecnologia, energia, turismu e di varorizà kissu capitari umanu, culturali e prufissunari di li sardhi i lu mondu, figliori di Sardhigna, emigraddi sardhi di tutti li ginnirazioni. I la Sardhigna ki tz'immagginemmu li sardhi di lu distherra debini turrà torra prutagunisthi di la terra nosthra;

9. LIBARTHAI D'ATTRAZÀ CAPITARI

Pa ginnirà una crescidada lesthra infrastrutturari di l'Isura, garantendi di lu tuttu lu cuntrollu pubbri-cu di li fattori maggiori di la produzioni, da la reti infrastrutturari a kissa di li sivvizi;

10. LIBARTHAI DI UNA "SANIDDAI JUSTHA" E DI LA TUTERA SUTZIARI,

Pa traguardhà libelli d'assisthentzia e cura cumentu si tocca e pa assé in gradu di fà accusthà e no d'alluntanà li maraddi da la saniddai sardha;

11. LIBARTHAI D'ATZIONI

Appruntendi la più manna riburutzioni burocratigga di l'era mudenna, bughhendizi tutti kissi passiggi inutiri e dendi amparu a lu printzipiu di lu risulthaddu;

12. LIBARTHAI DI FÀ ISCHITTÌ L'ALLUADORI

Pa pianificà la più impunenti obara di bonifigga e la turradda ke primma di l'ambienti di tutti kissi caburi industhriari alluaddi e di kissi miritari, turrendi a li sardhi tutti kissi logghi manni furaddi a eddi pa l'intaressi anzeni cuntrari a l'iviruppu di la Sardhigna.

La libarthai di lu Poburu Sardhu è lu kintari di una cumuniddai capatzi di frabbiggà lu rischattu soiu cu' lu cabbu e cu' lu cori.

Kistha "pintura" pa la terra nosthra parthi da lu pritzisaddu d'auni tutti kissi fotzi natziunari sardhi, di la puritigga e di lu sutziari, ki aggiani cumentu prioriddai assoruta la Sardhigna e lu Poburu soiu.

È un prugettu ki fazi la ciamadda a tutti li Sardhi Libari ki aggiani l'atza di mandà addanantzi un'iffida in gradu mannu e innubatiba pa lu gubennu di la Sardhigna. Un prugettu ki mira a unì li riburutzionari e moderaddi, pa prusighi cun fotza e deteimminazioni la libarthai di la Sardhigna e di lu Poburu Sardhu. Pa kisthu disizu mannu sevu puni a pari curaggiu e deteimminazioni, ipirientzia e sintzeriddai.

SARDHI LIBARI

Tanti, sabii, umpari
pa la Nazioni Sardha.